

आकाशवाणी

- प्रधानमंत्री नरेन्द्र मोदी होरें आखेया ऐ जे पिच्छले इक दहाके दौरान भारत दे रक्षा उत्पाद च त्रै गुणा कोला बी मता बाद्दा दर्ज कीता गया ऐ ते 2014 दे बाद च कोई 40 युद्धपोत ते पनडुब्बियां मुल्खे च त्यार कीतियां गेइयां न।
- राष्ट्रपति द्रौपदी मुरमू अज्जे थमां 4 दिन दे केरल दौरै पर अज्ज थिरुवनतपुरम पुज्जे करदियां न।
- बिहार विधानसभा चुनां दे दुए गेइ लेई दाखल नामजदगियें दी जांच अज्ज कीती जाहग। इस गेइ तैहत 20 जिलें दी 122 सीटें लेई 11 नवम्बर गी मतदान होग।
- जारी त्योहारें दी रुतै गी ध्यानै च रखदे होई भारतीय रेलवे यात्रियें दे भारी रश कन्नै निबड़ने लेई औने आहले दिनें च 8 जहार कोला मतियां रेलगइडियां चलै करदा ऐ।
- भारतीय रिजर्व बैंक दा आखना ऐ बाहरी दबाव ते अनिश्चितता दे बावजूद भारतीय अर्थबवस्था च स्थिरता ते वृद्धि संदोखजनक बनी दी ऐ।
- देयाली दे सिलसिले च NSE ते BSF अज्ज इक विशेष ट्रेडिंग महरत दा सरिस्ता करने जा रदा ऐ।
- बहरीन दे मनाया च आयोजित एशियाई युवा खेइड-2025 च भारत नै पारम्परिक कुश्ती "कुराश" च दंडु होर तगमे जिते न।

<><><><><><>

PM –INS Vikrant

प्रधानमंत्री नरेन्द्र मोदी होरें आखेया जे पिच्छले इक दहाके च भारत दा रक्षा उत्पादन त्रै गुणा बदिथै इक लकख 50 हजार करोड़ रुपें तगर पुज्जी गया ऐ। उ'नें आखेया जे बरे 2014 थमां लेइथै हूने तगर देसै च 40 शा मते युद्धपोत ते पनडुब्बियां बनाई गेइयां न।

मोदी होरें आखेया जे भारत हून मुख्यै च गै ज्यादातर रक्षा उपकरणों दा उत्पादन करदा ऐ-जेहदे तैहत तकरीबन-तकरीबन हर 40एं दिनें च नौसेना दे बेड़े च इक नमां युद्धपोत या पनडुब्बी जोड़ी जन्दी ऐ। भारतीय सशस्त्र बलें कन्ने हर बरे देयाली मनाने आहली अपनी परम्परा गी जारी रखदे होई प्रधानमंत्री होरें कल गोवा ते कारवार तट पर भारत दे पैहले स्वदेशी INS विक्रांत पर नौसेना कर्मियें कन्ने देयाली मनाई। इस दौरान बोलदे होई मोदी होरें आखेया जे आपरेशन सिंदूर दौरान त्रीने रक्षा सेवाएं मझाटै शानदार तालमेल करी गै पाकिस्तान गोडे टेकने पर मजबूर होई गया। उ'नें आखेया जे INS विक्रांत आत्मनिर्भर भारत ते "मेड इन इंडिया" दी इक बड्डी मिसाल ऐ। मोदी होरें प्रधानमंत्री दे रुपै च पहले बरे लद्दाख दे सियाचिन ग्लेशियर च तैनात सैनिकें कन्ने देयाली मनाई ही। पिच्छले बरे देयाली च ओह सर-क्रीक च तैनात सैनिकें कन्ने मौजूद रेह ते देशै दी सीमाएं दी राकखी करने आलें सुरक्षाकर्मियें कन्ने त्योहार मनाने दी अपनी परम्परा जारी रकखी।

<><><><><><>

Prez Kerala Visit

राष्ट्रपति द्रौपदी मुरमू होर अज्जे थमां चंऊ दिनें दी जातरा पर केरल जा'रदियां न। ओह अज्ज तिरुवनतपुरम पुज्जगंग। राष्ट्रपति होर कल दर्शन आस्तै शबरीमाला मंदरे च बी जागंग। वीरवारें ओह तिरुवनतपुरम दे राजभवन च साबका राष्ट्रपति के.आर. नारायण हुंदी मूर्ति थमां पर्दा गोआइगंग। राष्ट्रपति मुरमू होर श्री नारायण गुरु हुदी महासमाधि शताब्दी समारोह च बी शिरकत करगंग। ओह Ernakulam च St. Teresa कालेज ते पाला च St. Thomas कालेज दे कार्यक्रमें च बी शामिल होगंग।

<><><><><><>

Bihar Polls

बिहार विधानसभा चुनां दे दुए ते खीरी गेइ लेई दाखल नाजदगियें दी जांच अज्ज कीती जाहग। इस गेइ च 11 नवम्बर गी 20 जिलें दी 122 विधानसभा सीटें लेई वोट पोआए जागंग।

इस गेड़ च इनें 122 सीटें लेई 2 जहार 600 कोला मते नामांकन दाखल होए देन। मेदवार जेकर चाहन तां 23 अक्टूबर धोड़ी अपना नां वापस लेई सकदे न। राज्य च विधानसभा दा चुनां दंऊ गेड़ें च 6 ते 11 नवम्बर गी होआ करदे न। दूए गेड़ लेई नामांकन दाखल होने दे बाद केंई सीटें पर महागठबंधन दे बक्ख-बक्ख दल गै इक दुए खलाफ उतरे दे दिक्खे जा रदे न। केंई सीटें पर राष्ट्रीय जनता दल RJD, कांग्रेस ते भारतीय कम्यूनिस्ट पार्टी दे मदेवारें बश्कार गै मकाबला दिखने गी लब्बै करदा ऐ। RJD नै 61 ते CPI (ML) लिबरेशन पार्टी नै 20 सीटें पर अपने मेदवार तोआरे न।

<><><><><><>

Railways Special Train

मध्य रेलवे त्योहारें दौरान जातरियें दी भीड़ गी दिक्खदे होई औने आहले दिनें च तकरीबन 8 जहार वशेष रेलगड्डियां चलाग। रेलवे नै इक कोला लेइयै 19 अक्टूबर मझाटै त्योहारें दौरान जातरियें दी मंग गी पूरा करने लेई 4 जहार वशेष रेलगड्डियां चलाइयां हियां। रेलमंत्री अश्विनी वैष्णव होरें कल रेलवे बोर्ड दे वॉर रुम दा दौरा कीता ते त्योहारें दौरान जातरियें दी आओ-जाई दा जायजा लैता। उ'नें 24 घैंटें कम्म करने आहले कर्मचारियें दी सराहना कीती ते उ'नेंगी देयाली दियां शुभकामनां बी दितियां। देयाली ते छठ पूजा दौरान सखल्ली जातरा यकीनी करने लेई भारतीय रेलवे इस बरे 12 जहार शा मती वशेष ट्रेनें दा संचालन करा रदा ऐ, जेहड़ा पिच्छले बरे इस अवधि दौरान चलाई गेदियां 7 जहार 724 ट्रेनें शा मता ऐ। एह वशेष रेलगड्डियां भारती रेलवे दे सब्बनें ज़ोने च चलाई जा'रदियां न।

<><><><><><>

World Diwali Greetings

भारत च जंदे रोज जोशो-खरोश कन्नै देयाली दा त्योहार मनाया गया। एहदे चलदे दुनिया भरै थमां नेताएं देयाली दी शुभकामनां दितियां न। अमरीका दे राष्ट्रपति कार्यालय वाईट हाउस नै इक ब्यान जारी करदे होई देयाली गी अंधकार पर प्रकाश दी जित करार दिता।

राष्ट्रपति डोनाल्ड ट्रम्प होरें इस त्योहार गी मनाने आलें सब्भनें अमरीकियें गी मुबारकबाद दिती ते आखेया जे देयाली मेद- नमीं शुरुआत ते बुराई पर अच्छाई दी जित दा चेता नुआंदा ऐ। अमरीकी राष्ट्रपति हुंदे विशेष दूत सर्गियो गोर होरें अमरीका च भारत दे राजदूत विनय मोहन क्वात्रा हुंदे कन्ने इंडिया हाउस च देयाली समारोह च हिस्सा लैता। कनाडा दे प्रधानमंत्री मार्क कार्नी होरें बी देयाली दे मौके पर शुभकामनां दितियां। इस्सै चाली इजराइल दे प्रधानमंत्री बेनजामिन नेतन्याहू होरें प्रधानमंत्री नरेन्द्र मोदी ते भारत दे लोकें गी देयाली दियां शुभकामनां दितियां ते भारत ते इजराइल मझाटै निग्गर सरबंधें पर बी बल दिता।

<><><><><><>

RBI

भारतीय रिजर्व बैंक दा आखना ऐ दुनिया भरें च अर्थ-बवस्थाएं च बेजकीनी आहली स्थिति दे बावजूद भारतीय अर्थबवस्था उप्परोतली मजबूती दा प्रदर्शन करा करदी ऐ ते उच्ची बरास दर हासल करने लेई त्यार ऐ। आर.बी.आई दे अक्तूबर बुलेटिन च कल आखेया गया ऐ जे छमता उपयोग ते घरेलू मंग दे संकेतकें, सुधार दी सारत दिती ऐ। एहदे च आखेया गया ऐ कि विनिर्माण ते सेवाएं दे क्षेत्रें च उप्परोतली सुधार ते मजबूती दिखने गी लब्बे करदीऐ, जिसलै जे मंहगाई दर बी काफी हद तगर हेठ आई ऐ। आर.बी.आई नै आखेया ऐ कि संकेतक, शैहरी मंग च सुधार ते ग्रामीण मंग च मजबूती दी सारत देया करदे न। रिजर्व बैंक दा आखना ऐ जे अंतराष्ट्रीय मुद्रा कोष नै 2025 लेई भारत दे सकल घरेलू उत्पाद जी.डी.पी. च बाददा होने दे अनुमान च बी भारत लेई 20 बुनियादी अंक बधाइयें 6 इशारिया 6 प्रतिशत दस्सेया ऐ जेहड़ी जे इक उत्साह बधाने आहली गल्ल ऐ।

<><><><><><>

Share Market

देयाली दे सिलसिले च राष्ट्रीय स्टॉक एक्सचेंज NSE ते BSE अज्ज इक विशेष महरत ट्रेडिंग सत्र आयोजित करगंन। एह रस्मी बपार सत्र दपैहरी पौने दो बजे कोला लेइयें पौने त्रै बजे धोडी आयोजित कीता जाहग।

एह महूरत कारोबारी सत्र देयाली गी शुरु होने आहले हिंदू नमें माली बरे, विक्रम सवंत 2082 दी शुरुआत दा बी प्रतीक ऐ। NSE निफती ते BSE सेंसेक्स सूचकांक कल विक्रम सवंत 1981 दे खीरी ध्याड़े बरे दे सब्भनें शा उप्परले स्तर पर बद होए। ऐसा मन्नेया जन्दा ऐ कि महूरत या शुभ समें दौरान शेयरें दी ट्रेडिंग यानि खरीद फरोखत करने कन्नै समृद्धि ते माली फायदा होंदा ऐ। शेयर बाजार दे माहिर विश्लेषकें दा आखना ऐ कि देयाली दे मौके कोई बी उद्यम शुरु करना इक शुभ मौका मन्नेया जंदा ऐ ते इस दौरान ट्रेडिंग करने कन्नै साल भर मुनाफा गै मनाफा हुंदा ऐ।

<><><><><><>

Police Commemoration Day

अज्ज पुलस स्मृति दिवस ऐ। 19 सौ नाठ च इस्से दिन लद्दाख दे हॉट स्प्रिंग्स च भारी हथियारें कन्नै लैस चीनी सैनिकें आसेया घात लाइयै कीते गेदे हमले च 10 बहादुर पुलसकर्मियें अपने प्राणें दी आहुति दिती ही। तदुं थमां हर बरे 21 अक्टूबर गी पुलस स्मृति दिवस दे रुपै च मनाया जन्दा ऐ। रक्षामंत्री राजनाथ सिंह नमीं दिल्ली स्थित राष्ट्री पुलस स्मारक पर अज्ज पुष्पांजलि अर्पित करगंन। केन्द्री गृह-राज्यमंत्री, केन्द्री सशक्त पुलस बलें ते केन्द्री पुलस संगठनें दे प्रमुख बी पुष्पांजलि अर्पित करियै शहीदें गी शरदांजलि देगंन। इस मौके पर केन्द्री सशस्त्र पुलस बलें ते दिल्ली पुलस दी इक संयुक्त परेड बी आयोजित कीती जाग।

<><><><><><>

Asrani Dies

मशहूर हिंदी फिल्म अभिनेता गोवर्धन असरानी हुंदा लम्मी बमारी मगरा कल मुम्बई च काल होई गया। ओह चौरासी बरे दे हे। शोले फिल्म च जेलर दी भूमिका लेई जाने, जाने आले असरानी होरें चुपके-चुपके, भूल-भुलैया, धमाल ते बंटी और बबली -2 जनेही हिट फिल्में च अभिनय कीता ऐ।

जददी तौरा राजस्थान दे जयपुर दे रौहने आहले गोवर्धन असरानी होरें भारतीय सिनेमा च शानदार जातरा शुरु करने शा पैहले अपने गृहनगर दे St. Xavier's स्कूल च शिक्षा हासल कीती ही। 5 दहाकें शा मते दे करियर च असरानी होरें हिंदी सिनेमा च वशेष रूपै नै हास्य कलाकार दे रूपै च महत्वपूर्ण योगदान दिता।

<><><><><><>

Youth Games

बहरीन दे मनामा च चला रदे एशियाई यूथ गेम्स 2025 च भारत नै कुश्ती दे इक पारम्परिक स्वरूप कुराश च 2 होर तगमे जिते न, जेहदे नै इक खेड्ड च तगमे दी गिनतरी बदियै 3 होई गई ऐ। महिलायें दे बंजा किलोग्राम वर्ग दे फाईनल च कनिष्का बिधूड़ी, उज्बेकिस्तान दी मुबीनाबोन् करीमोवा कोला 3-0 कन्नै हारी गेइयां। पुरुषें दे 83 किलोग्राम वर्ग च अरविंद होरें कैंह दा तगमा अपने नांह कीता। ऐतवारें महिलायें दे 70 किलोग्राम वर्ग च खुशी नै कैंह दा तगमा जितियै भारत गी पैहला तगमा दोआया हा। इस महीने दी 31 तरीख गी सम्पन्न होआ रदे एशियाई यूथ गैम्स च कुल 222 भारतीय खडारी हिस्सा लै रदे न।

<><><><><><>